

ԹՈՒՄԱՆԵԱՆԻ ՅԱՅՏՆՈՒԹԻՒՆԸ 50ԱՄԵԱԿԻ ՅՈՐԲԵԼԵԱՆԱԿԱՆ ՀՐԱՊԱՐԱԿՈՒՄՆԵՐՈՒՄ

ԵՒԱ ՄՆԱՑԱԿԱՆԵԱՆ
mnacakanyaneva@mail.ru

1900ականների երկրորդ և 1910ականների առաջին կեսերի տասնամեայ շրջանը հայ ժողովրդի կեանքում նշանաւորում է հոգեւոր վերածնութեան ճիգերով՝ ինչպէս արեւելահայ, այնպէս էլ արեւմտահայ հատուածներում: Աննախընթաց աշխուժանում է մշակութային կեանքը: Մտաւորականութիւնն աշխատում է օգտագործել ամէն առիթ՝ հանրային հետաքրքրութիւն արթնացնելու համար հայ հին ու նոր հոգեւոր արժէքների նկատմամբ: Առանձին աշխուժութիւն է նկատում յատկապէս գրական կեանքում՝ ոչ միայն բուն ստեղծագործական, այլև ստեղծուած արժէքների վերլուծութեան ու իմաստատւորման ոլորտներում: Այդ առիթով բուն բանավեճեր են սկսում պարբերական մամուլում, գործնական քննարկումներ են տեղի ունենում նշանակալից գրական երեսոյթների շուրջ (օրինակ՝ Լեւոն Շանթի *Հին Ասորաձների* գրական «դատը» Թիֆլիսում 1913 Փետրուարի 3ին եւ Պոլսում գրական ասուլիսների շարքը): Երեկոյթներ, ցերեկոյթներ, տարբեր տեսակի հանդիսութիւններ են կազմակերպւում նուիրուած հայ եւ համաշխարհային գրական մեծութիւններին, ինչպէս՝ Միքայէլ Նալբանդեան, Րաֆֆի, Ծերեց, Շեքսպիր, Սերվանտես եւ ուրիշներ: Յաճախողէ՛ք են դառնում գործող հեղինակների մեծարման երեկոյներն ու յոբելեանական հանդէսները, որոնք կազմակերպւում են մեծ մասամբ Հայ Գրողների Կովկասեան Ընկերութեան կողմից՝ նախագահ Յովհաննէս Թումանեանի նախաձեռնութեամբ¹: Յատկապէս Շիրվանզադէի գրական գործունէութեան 35ամեակը 1911ին, լայն արծագանգ է գտնում նաեւ Պոլսի մտաւորական շրջաններում:

Թումանեանն առհասարակ կարեւորում էր այդպիսի հանդիսութիւններն, որպէս ազգային մշակոյթի աչքի ընկնող արժէքները ժողովրդին ճանաչելի դարձնելու լաւագոյն միջոցի, միայն զգուշացնում էր *«արժանատրի ու անարժանի, գեղեցկի ու փգեղի, լափ ու վափի տխուր շփոթութիւնից»*²: «Յորելեանների Դէմ» յօդուածում, նա նկատում է՝ մեծածիր յոբելեանական հանդիսութիւնները «ազգային աղէտի բնատրոյթին» չպէտք է կրեն. դրանք պէտք է կատարուեն միայն հանրային ճանաչման արժանացած իրական մեծութիւնների համար. միւս արժանատրոյներին պէտք է յարգանքի տուրք մատուցել ըստ «պատշաճատրութեան, վայելչութեան»³:

Այս գիտակցութեամբ էլ նա լուրջ չէր ընդունում ընկերների ու բարեկամների յաճախակի ակնարկները՝ հանդիսատրութեամբ նշելու իր ծննդեան 50 եւ գրական գործունէութեան 30ամեայ յոբելեանները:

Այնուամենայնիւ, 1919ի Փետրուար-Մարտին համաժողովրդական մեծ խանդավառութեամբ նշում է Թումանեանի ծննդեան 50ամեակը: Այդ խանդավառութիւնը անսպասելի էր թերեւս միայն իր՝ յոբելեարի համար: «Ակամայից ընկայ յոբելեանի մէջ,- գրում է նա իր բարեկամ Յակոբ Սահլեանին,- որից էնքան շարք էի վախեցնում: Եւ ահա երկու շաբաթուայ մի ցուցակ են դրել գրպանումս, թէ ամէն օր որտեղ եմ լինելու: Այժմ ես էլ մի տեսակ թամաշատուր եմ դարձել եւ զարմանում եմ երկու բանի վրայ, մէկ՝ թէ ինչքան կենսունակ է մեր ժողովուրդը եւ բնաւ յուսահարուել չգիտի, մէկ էլ՝ թէ ինչքան զօրեղ է ժողովուրդների մէջ համերաշխութեան ու եղբայրութեան զգացմունքը: Հենց նոր մօտոս էր մի պարզամտութիւն – հայերից, ռուսներից, վրացիներից, թուրքերից ու հրեաներից եւ յարկապէս նրա համար, որ ես եղբայրութիւն ու համերաշխութիւն եմ սիրեք»⁴:

Պատահական չէ, որ բանաստեղծն իրեն ուղղուած մեծարանքի այդ ցոյցերը բացատրում էր վերջին երկու հանգամանքով: Թումանեանին, իհարկէ, չի կարելի հանդիմանել կեղծ համեստութեան համար. նա լաւ էր ճանաչում ինքն իրեն եւ իր համար ի վերուստ սահմանուած առաքելութեան խորհուրդը, բայց գիտէր նաեւ, որ դեռ չի կարողացել լիովին հատուցել այն պարտքը, որ իբրեւ ստեղծագործող ունէր իր ժողովրդի եւ աշխարհի հանդէպ: Դրա համար էլ յոբելեանական այդ խանդավառութիւնը զարմանքով ու ներողամիտ ժպիտով էր ընդունում:

Յիշել եւ մեծարել որեւէ գործչի, ինչպէս ասում էր Թումանեանը, նշանակում է նրանով բարձրանալ ու մեծարուել: Այս հաւաքական գիտակցութեամբ էլ բանաստեղծի յոբելեանը վերածում է համաժողովրդական ինքնաբովս, աննախադէպ տոնահանդէսի. ի տարբերութիւն մնացած յոբելեանների, կազմակերպում էր ինքնաբերաբար, ներքին մղումով, առանց հրահանգների, յատուկ որոշումների ու միջամտութիւնների: Յոբելեանական տարատեսակ հաւաքներ էին կազմակերպում աշակերտներն ու ուսուցիչները, ուսանողներն ու դասախօսները, գրողներն ու գիտնականները, հասարակական ու քաղաքական գործիչները, քաղաքաբնակ ու գիւղաբնակ շարքային ընթերցողները, համակիրներն ու երկրպագուները: «Զէ՛ որ դա,- ինչպէս իրաւացիօրէն նկատում է ուսումնասիրողը,- ոչ թէ սովորական յոբելեան էր, այլ ժողովրդի ինքնաճանաչման եւ ինքնահաստատման մի իրողութիւն, որի կարիքն այնքան զգում էր 1919 թուականի հայրութիւնը»⁵: Միջոցառումները յաջորդում էին միմեանց, Փետրուարից մինչեւ գրեթէ Ապրիլի վերջը մամուլը, գրական-հասարակական հանդէսները հեղեղուած էին Թումանեանի յոբելեանին նուիրուած միջոցառումների, ցերեկոյթների ու երեկոյթների նիւթերով, շնորհատրական հեռագրերով ու նամակներով, մեծ կամ փոքր ծաւալի բազմաթիւ նիւթերով, որոնք յագեցած էին մեծարման շնչով ու տրամադրութեամբ:

Հայ գրականագիտութեան մէջ Թումանեանին նուիրուել են բազմաթիւ արժէքատու ուսումնասիրություններ, յօդուածներ, սակայն 100ամեայ հե-

ռատրոփինից անելորդ չէ մէկ անգամ եւ անդրադառնալ նրա 50ամեայ յրբելեանին, մասնատրապէս նրա ստեղծագործութեան ու մարդկային նկարագիրը նորովի ու իրովի ներկայացնող հրապարակումներին: Յօդուածների քանակը եւ ծաւալը սահմանափակում են դրանց առանձին-առանձին եւ հանգամանօրէն անդրադառնալու հնարատրոփինը մէկ յօդուածի սահմաններում: Ուստի փորձել ենք առանձնացնել յրբելեանական բազմաբնոյթ ելոյթների հիմնական դրոյթները, որոնք բնութագրում են յրբելեարին՝ իբրեւ բանաստեղծի, մարդու, հասարակական գործչի եզակիութիւնն ու անկրկնելիութիւնը:

Յրբելեանական հրապարակումները, տարաբնոյթ լինելով հանդերձ, ունեն ընդհանրութիւններ: Ա.՝ դրանց հիմնական մասը գրուած է մարդկային ջերմ սիրով, անկեղծ պոռթկումներով ու խոստովանութիւններով, գնահատման անխախտ համոզմունքով, ժամանակի փորձութիւնն անցած տեսակէտներով: Բ.՝ ունեն բովանդակային նուրբ աղերսներ, որոնք թոյլ են տալիս դրանք բաժանել երեք խմբի՝ ա) գնահատանքի ու մեծարման արտայայտութիւններ, բ) Թումանեանի բանաստեղծական աշխարհի վերլուծութեան, քննութեան նոր փորձեր, գ) չափածոյ ձօներգեր եւ ուղերձներ:

Յրբելեանի առիթով Թումանեանին բանաստեղծութիւններ են նուիրում Ալեքսանդր Կոլեբեակինը⁶, Արմէնուհի Տիգրանեանը⁷, Ազատ Վշտունիս⁸, Պահարէն⁹, Սահիկեանը¹⁰, Արսէն Դլտճեանը¹¹, Վասիլի Զոտան¹², Լ. Ազնաւուրեանը¹³, Յարութիւն Թումանեանը¹⁴ եւ ուրիշներ:

Գրապատմական առումով առաւել կարեւորում են մամուլի հրապարակումները: Գնահատանքի ու մեծարման շեշտադրումով աչքի են ընկնում *Մշակ*, *Ժողովրդի Ձայն*, *Աշխարհատր*, *Յառաջ* եւ այլ պարբերականներում տպագրուած յօդուածները: Հեղինակներից իրաքանչիւրը (Դափթ Անանուն, Ստեփան Զօրեան, Յարութիւն Սուրխաթեան, Մաթեոս Դարբինեան, Ալեքսանդր Պապովեան, Գարեգին Լեւոնեան, Սմբատ Տէր Աւետիսեան, Սալ-Ման, Սերգէյ Գորոդեցկի, Աւետիս Ահարոնեան, Վահան Խորէնի են.) իր նկատած նրբերանգով ամբողջացնում է բանաստեղծի դիմապատկերը: Մեծագոյն ակնածանքով ու սիրով է շնչում «Ժողովրդի Երգչի Տօնը» անստորագիր գրութիւնը՝ տպագրուած 1919ի *Յառաջի*¹⁵ հմբ. 32ում: Թում է՝ հեղինակը յատուկ խորհրդով է անստորագիր թողել իր գրութիւնը՝ յուշելու համար, թէ դա ամբողջութեամբ հայ ժողովրդի հաւաքական սիրոյ եւ մեծարման խոստովանութիւնն է. չէ՞ որ բոլորը՝ ծեր ու մանուկ, տղայ ու աղջիկ, գիւղացի ու քաղաքացի, սնուել ու մեծացել, վայելել ու հարստացել են Թումանեանի հոգեւոր գանձերով: Նրա ստեղծագործութիւնը, ինչպէս հաաստում է գրութեան հեղինակը, հայ ժողովրդի «*ոգու սքանչելի ու խորհրդատր մայրեանն է, որ դեռ երկար ժամանակ հոգեկան սնունդի, գերագոյն վայելքի ու դաստիարակութեան վսեմ աղբիւր պէտք է լինի*»: Ակնյայտ է Թումանեան-հայ ժողովուրդ անտրոհելի միասնութիւնը: Բանաստեղծը հանճարեղ խորաթափանցութեամբ է զգացել, վերապրել ու

կենդանագրել հարազատ ժողովրդի ապրումներն ու խոհերը, յոյզերն ու ձգտումները, տառապանքը: Իրապէս, «Յ. Թումանեանը, իր ժողովրդի մտքի, խօսքի ու բանաստեղծական ձեւի մեծ վարպետը մի ինքնարժէք մեծութիւն, մի բնական, անգնահատելի գանձ է մեր գրականութեան համար... Նրա ստեղծագործութիւնը ամենափայլուն օրինակն ու ապացոյցն է մեր ժողովրդի ստեղծագործական մեծ ու անսպառ կարողութեան»: Այս մտքերը ուղղակի հաստատումն են, որ ժողովրդի բանաստեղծը անմահատում է իր ժողովրդի հետ:

Ասուածը հաւաստելու է գալիս «Նոր Սերնդի Բարեկամը» գրութեան հեղինակ Վաղարշակ Նորենցը («Նորերից» ստորագրութեամբ), որ Թումանեանի հանդէպ համաժողովրդական սիրոյ գաղտնիքը այսպէս է մեկնում. «Գոռոզ չէ նա՛ ի դէմս իր համբաւի, գգուող ու գուրգուրող, միշտ ժպտերես, խրախուսական, մեծ է իր անժխտելի փաղանդի մէջ, իր անուշով, դիրքով, բայց հասարակ է մարդկային առօրեայով, սովորական՝ որքան մի ընկեր... Եւ սրանք են այն արժանիքները, որ սալունից դուրս մարտնչելի են ոչ միայն մտաւորականին կամ ինտելիգենտին, այլեւ գիտացուն, աշակերտին ու նամանաւանդ երեխաներին»¹⁶:

Գրութեան հեղինակն ընդգծում է բանաստեղծի առաքելութիւններից եւս մէկը՝ մատաղ սերնդի «հոգեկան բարձրացմանը», գեղագիտական դաստիարակութեանը ուղղուած անմնացորդ նուիրումն ու ծաւալած գործունէութիւնը¹⁷. «Փոքրիկ մանուկն առաջին անգամ էսթետիկապէս սնում է Թումանեանով եւ նրանով էլ մեծանում. եթէ մէկը բախտ է ունեցել մօտիկից ծանօթանալու նրա անձի հետ, նա անշուշտ, գիպակցում է այն համաչափութիւնը, որ կայ այդ մեծ բանաստեղծի անձնատրուութեան ու ստեղծագործութեան պարզութեան մէջ: Նրա կէտարեայ գոյութիւնը եւ երեսնամեայ գրական գործունէութիւնը պարուսաստումն է նոր սերնդի աճման ու հոգեկան բարձրացման»¹⁸:

Այս տեսակէտը նորութիւն չէր, վաղուց հաստատուած իրողութիւն էր հայ իրականութեան մէջ: Թումանեանի մանկական ստեղծագործութիւնները մասնակի բացառութիւններով բարձր են գնահատուել ժամանակի քննադատութեան կողմից: Բազմաթիւ գրախօսութիւններ, յօդաձեւեր մասնակիորէն կամ ժամանակի ընդհանուր համապատկերում պարզաբանել են Թումանեանի մանկագրութեանը բնորոշ առանձնայատկութիւնները, նախանշել դրանց անփոխարինելի դերը երեխաների դաստիարակութեան եւ արժէհամակարգի ձեւաւորման գործում:

* Լեւոնեանը՝ «Բանաստեղծը» փոքրիկ յօդուածում մարգարէական կանխագուշակութեամբ ընդգծում է բանաստեղծի բացառիկութիւնը, որ հարկամեայ հեռաւորութիւնից կարող է արձանագրուել իբրեւ հաւաստի իրողութիւն. «Անձեռագործ արձան է կանգնեցնում իր համար հանճարեղ բանաստեղծը եւ ոչ մի քար, ոչ մի հարուած, մրրիկ կամ յորձանք չեն կարող հասնել, չեն կարող վնասել այդ հոյակապ կոթողին, մտքի գեղեցկի եւ

վսեմի հոյակապ շէքքին»¹⁹: Յօդուածն յատկապէս ընդգծում է, որ Թումանեանն իր հոգու եւ մտքի թոփշքները, տաղանդը մշտապէս նուիրաբերել է հայրենիքին:

Արծալ բանաստեղծութիւն է յիշեցնում *Ժողովրդի Ձայնի* նոյն համարում (39) տպագրուած «Մեր Յովհաննէս Թումանեանին» նիւթը, որի հեղինակը՝ «Հայեազն» ստորագրութեամբ, մեծարում է բանաստեղծին՝ կիրառելով փոխաբերութիւնների, մակդիրների ու համեմատութիւնների շքեղ համալիր: «Փառք քեզ» սկսուածքով միջանի պարբերութիւններում դասական ներբողների ոճով ընդգծում է բանաստեղծ-մարդ-հասարակական գործիչ Թումանեանի մեծութիւնը:

Նոր Նախիջեանի *Հայ Համայնք* հանդէսի հմ. 16ում տպագրում է Երուանդ Շահագիզի «Յովհաննէս Թումանեան» յօդուածը²⁰: Թումանեանին դասում է հներից յետոյ եկող այն նորերի շարքին, որոնց ստեղծագործութեան մէջ «երեւում է հայ ժողովրդի դէմքը իւր լիակապար իրական պատկերով, իւր մտածելակերպով, աշխարհահայեացքով, խոհերով ու տեսչերով»²¹: Յատուկ ընդգծում է գրական միջավայրում եւ հասարակական գիտակցութեան մէջ այդ նոր «կաճառի» տեղը հաստատելու համար Թումանեանի հսկայական ջանքերը: Արծանագրում է այն բացառիկ փաստը, որ բանաստեղծի առաջին գրական փորձերի գնահատողը եղել է ոչ թէ պաշտօնական քննադատութիւնը, «այլ ինքը հայ ժողովուրդը, որ մի կողմ թողնելով պաշտօնական քննադատութիւնը եւ նրա կատարելիք վաւերացումը ու սրբագործումը, ինքը իւր բնագրով, իւր հոգով ճանաչում է ու գնահատում բանաստեղծին՝ վարակելով, քաշելով ու տանելով իւր յետեւից եւ քննադատութիւնը»²²: Այս բնութագիրը ամօլի քան խօսուն է. քննադատական ամենատարբեր ուղղութիւնների եւ մեթոդների բովով անցած բանաստեղծի գրական ուղին իրականում հարթ չի եղել. յաճախ է Թումանեանը ստիպուած եղել պայքարելով կամ գիտակցուած լուրջեամբ յաղթահարել իր բնականոն գրական յառաջընթացը խոչընդոտող շատ արգելքներ՝ մշտապէս պահելով իր դիմագիծն ու մարդկային տեսակը: Սակայն հայ ժողովուրդը ներքին մի մտահայեցութեամբ եւ ներըմբռնումով կարողացել է ճանաչել ճշմարիտ բանաստեղծին, որի ստեղծագործութիւնների իրաքանչիւր տողը հայ մարդու հոգու ճիչն է, սրտի զարկը, թաքուն վիշտը, դառը ժպիտը, նաեւ կենսունակութեան վառ արտայայտութիւնը:

Թումանեանի ստեղծագործութեան կարեւոր եւ անբաժանելի մասը Շահագիզը համարում է նրա յօդուածները: Այդ տեսակին բանաստեղծը դիմում է այն ժամանակ, բացատրում է յօդուածագիրը, երբ որեւէ հրատապ խնդիր է դրում հրապարակի վրայ: Հետաքրքիր դիտարկումներ է անում նաեւ նրա մարդկային տեսակի մասին. «Նա մի անուշ խօսող, պատմող, ծիծաղող ու ծիծաղեցնող, կենսուրախ ու սրամիտ մարդ է, ամէնքի հետ շուր մերմացող, ամէնքի սիրտը իւր հետ կապող,

նա բանաստեղծ է ոչ թե միայն այն ժամանակ, երբ ստեղծագործում է, այլ բանաստեղծ է եւ իր առօրեայ կեանքում. նրա խօսուածքը, զրոյցը, կարակը, սրաբանութիւնները բոլորն էլ բանաստեղծութիւն են, որ նա անգիրակցաբար անվերջ ու անհատում շոյալում է ամէն րոպէ...»²³:

Լյսպիսով՝ յիշեալ յօդուածները հաստատում են, որ 50ամեայ յրելեարը արդէն վաստակել էր ժողովրդի ամենասիրելի ու հարազատ բանաստեղծը լինելու պատիւը:

Յոյգերով զեղումնառատ այս գրութիւնների կողքին, անշուշտ, առաւել կարեւորում են այն հրապարակումները, որոնցում փորձեր են արում վերլուծելու եւ արժեւորելու բանաստեղծի երեսնամեայ գեղարուեստական վաստակը: Վերլուծութեան մեթոդաբանութեան տեսակէտից յօդուածները կարելի է բաժանել երկու խմբի: Առաջին խմբում Թումանեանի երկերը մեկնաբանում ու արժեւորում են դասական գեղագիտութեան, երկրորդում՝ հասարակական-քաղաքական կացութեան չափանիշներով: Նկատի ունենալով յօդուածի սահմանափակ ծաւալը՝ առաջին եւ երկրորդ խմբից առանձնացրել ենք միայն մեր կարծիքով ամենաբնորոշները:

Զօրեանը իր յօդուածը սկսում է հռետորական հարցադրումով «Ո՞վ է Յովի. Թումանեանը»: Հարցը պատահական չէ. ժամանակի մամուլը, մտաւորականներից շատերը, ինչ-որ անհասկանալի օտարամոլութեամբ, խուսափում են սեփական ազգի քանքարաւորներին գնահատելուց: Զօրեանը միանգամայն վստահ յայտարարում է. «... Թումանեանը մեզ ներկայանում է իբրեւ համազգային բանաստեղծ: ... Թումանեանը հայ գրականութեան համար նոյնն է, ինչ որ Պուշկինը ռուս գրականութեան համար»²⁴:

Յօդուածագիրը հետաքրքիր եւ տիպիկ աղերսներով զուգադրում է երկու մեծութիւններին: Երկուսին միատրողը անմնացորդ սէրն է դէպի հարազատ ժողովուրդը: Երկուսն էլ «յայտնաբերում են ցեղային նկարագիրը, ոգին, աշխարհահայեացքը, ինչ որ նրանց դարձնում է իւրայինների համար սիրելի ու հարազատ, օգարների համար՝ նորագիւտ ու գրաւիչ, իսկ նրանց գործերը՝ համազգային, հեղեւաբար եւ համամարդկային»²⁵: Զօրեանը եւս ընդգծում է Թումանեանի ստեղծագործութեան ամենակարեւոր յատկանիշը՝ ժողովրդայնութիւնը, որ միատրում է Թումանեանին եւ Պուշկինին: Հայ բանաստեղծների մէջ դժուար է գտնել մէկին, որ իր երկերով այնքան հարազատ լինի ժողովրդին, որքան Թումանեանը. «Անգրագէտ գիտացուց սկսած մինչեւ նրբաճաշակ մրատրականը հաւասարապէս հասկանում են Թումանեանին եւ զմայլում նրանով: Սա մի բացառիկ երեւոյթ է, որ ինքնին ապացուցում է բանաստեղծի մեծութիւնը, մի երեւոյթ, որ ցոյց է տալիս, թէ բանաստեղծն իր ժողովրդի մտից ու արիւնից է, այնքան հարազատ, որ եթէ մի օր աշխարհի բոլոր առանձին ժողովուրդների բանաստեղծութեան ցուցահանդէս լինի, հայ ժողովուրդը ուրիշ ոչ ոքի չի կարող ուղարկել, բացի Թումանեանից, իբր իւրօրինակ զգարիւն հայ բանաստեղծի, այնպէս, ինչպէս Ռուսաստանը ներկայացնողը կարող է լինել

միմիայն Պուշկինը»²⁶: Ջորեանը իր ասելիքն ամփոփում է սեղմ բանաձե-
տումով. «Թումանեանը համազգային բանաստեղծ է: Թումանեանը հայոց
Պուշկինն է»²⁷: Արժէ յիշեցնել, որ ինքը՝ Թումանեանը՝ յայտնի դրամբեա-
նիզմի դէմ գրած յօդուածներից մէկում որոշակի ընդհանրութիւն էր տես-
նում իր եւ ռուս բանաստեղծի գրական ճակատագրերի միջեւ²⁸:

Աւելի վաղ՝ 1914ին, Թումանեան-Պուշկին զուգահեռին անդրադարձել
էր նաեւ Վահան Տէրեանը «Հայ Գրականութեան Գալիք Օրը» զեկուցման
մէջ. «Այսօր Թումանեանը իր լեզուն հասցրել է այն բիւրեղանման պարզու-
թեան, որը մօտեցնում է նրան ուղիղ Պուշկինին»²⁹, եւ որը նրա գերագոյն
արժանիքներից մէկը պիտի համարուի»³⁰:

Գրականագիտական տեսանկիւնից որոշակի հետաքրքրութիւն է ներ-
կայացնում նաեւ Պապովեանի «Յաւերժի Տեսչը» յօդուածը: Հեղինակը
Թումանեանի ստեղծագործութեան մէջ կեանքի ու մահուան, մասնատրի
եւ հանուրի, չարի եւ բարու, անհունի ու յաւերժի, տիեզերական ներդաշ-
նակութեան եւ այլ հարցերի մասին փիլիսոփայական երկար խորհրդա-
ծութիւններից յետոյ ընդգծում է ասելիքի հիմնահանգոյցը. այդ մտորում-
ները բանաստեղծին չեն մղում «յարարեւ հաշտութեան, անվրդով սիրոյ
եւ խաղաղ լաւարեսութեան» երանաւէտ եզերքը, «մանաւանդ որ նրա
պանթէիզմն էլ ոչ բուրդայական նիրանա է, որ հրաժարում է այն ամէ-
նից, ինչ մարդկային է, եւ ոչ էլ Սպինոզայի «միահանուրը» ..., որ, ըստ Շո-
պենհաուզրի, մի «քաղաքավարի աթէիզմ» է»³¹: Նրա սէրը անհուն է, նովի-
րումը՝ անսահման, սակայն նոյնքան մեծ է «դարդը», որ կարող է խոստո-
վանել միայն Աստծուն: «Հայաստանի բացառիկ կեանքը թեահարում է
պոեզիի անհունի ճախրանքը... եւ նա, շփոթուած յաւերժի շէմքին, բերում է
Աստծուն իր վիշտը՝ հայի վիշտը, որի խաւար ծովի մէջ լող է փայտա պոե-
զիի փառապագին անհունութիւն որոնող ոգին»³²: Պապովեանի դիտար-
կումների մէջ կենտրոնականն ու հետանկարայինն այն է, որ նա բանաս-
տեղծի փիլիսոփայական խոհերը չի կտրում իրական հողից, զգում է, որ
դրանց հիմքը մարդկային կեանքի անկատարութեան գիտակցումն է,
մասնատրապէս հայ ժողովրդի օրհասական վիճակը: Յօդուածի աւար-
տին, բերելով «Հայրենիքիս Հետ» բանաստեղծութեան վերջին տունը,
եզրակացնում է. «Մեր հայրենիքի հետ կապուած յոյսերի իրագործումը
լոյսի յաղթանակ է. նրա ազատագրումը խաղաղութեան, եղբայրութեան եւ
համամարդկային սիրոյ նուաճումն է... Պոէ՛տ, շարունակի՛ր անդադրում
տեսնանքներդ. յոյսի, լոյսի հայրենիքդ պիտի փրկուի, դու պիտի նուաճես
յաւերժին»³³:

«Յովհաննէս Թումանեան» վերնագրով ստուարածաւալ
ուսումնասիրութիւն է տպագրում Պիատիգորսկի Ալիք հանդէսում, որի
հեղինակ Եփրեմ Տէր Մարտիրոսեանը փորձում է տալ բանաստեղծի
ստեղծագործութեան ամփոփ բնութագիրը, որտեղ կան դիտարկումներ,
որոնք որոշակի հետաքրքրութիւն են ներկայացնում:

Այսպես՝ Տէր Մարտիրոսեանն ընդգծում է բանաստեղծի դիւցազներգական մտածողութիւնը, ուստի թեթեւօրէն անցնելով նրա քնարերգութեան վրայից՝ հանգամանօրէն անդրադառնում է պոէմներին, որովհետեւ, ինչպէս բացատրում է նա, «*Թումանեանը, բառիս ընդարձակ իմաստով, հիմնադիրն է ազգային պոէմի, որի բովանդակութիւնը ժողովրդի կեանքն է*»³⁴: Ուշադրութեան արժանի մեկնաբանութիւններ կան առանձին պոէմների վերաբերեալ: Օրինակ՝ «Մարօ» եւ «Անուշ» պոէմներում յօդաձագիրը յատուկ ընդգծում է հայ կնոջ իրաւագուրկ, ողբերգական կացութիւնը: Բոլոր հերոսներն էլ ակամայ դառնում են «աղաթի», ժամանակի ընթացքում սրբագործուած սովորութիւնների գերին եւ զոհը: ««Լոռեցի Սաքօն» պոէմում մատաղ սերնդի դաստիարակութեան հիմունքներն են հանդէս բերում»³⁵, - համոզուած նկատում է Տէր Մարտիրոսեանը: Եթէ նկատի ունենանք, թէ ժամանակին որքան բանավէճեր են ծաւալուել Սաքոյի խելագարութեան հոգեբանական հիմնատրուածութեան շուրջ, ապա այս բնութագիրը կարելի է համարել պոէմի հեղինակային մտայնացման նոր մեկնաբանութիւն: «Սասունցի Դաւիթ» պոէմն արժեւորում է բանահիւսական նիւթի մշակման թումանեանական մեթոդի տեսանկիւնից: Փոքրածաւալ անդրադարձի եզրակացութիւնն այն է, որ բնօրինակի գեղարուեստական մշակումներից ամենայաջողուածը Թումանեանինն է, «որը առհասարակ գիրք վարպետօրէն օգտուել ժողովրդական բանահիւսութեան գոհարներից՝ միաժամանակ հաւատարիմ մնալով նրա արտայայտութեան հիմնական պահանջներին»³⁶: Այսպիսի գնահատումները յատկապէս կարելուորում են, եթէ նկատի ենք ունենում յայտնի դրամբանիզմի պարբերական յարձակումները, նաեւ որոշ քննադատների՝ պոէմի հեղինակային մշակման վերաբերեալ բացասական կարծիքները:

Տէր Մարտիրոսեանը անդրադառնում է նաեւ բանաստեղծի հայրենասիրական երգերին, որոնք, ինչպէս եզրակացնում է նա, խոր մարդասիրութեան արմատներ ունեն եւ զերծ են մարդատեացութիւնից:

Տէր Մարտիրոսեանը բաւական հանգամանօրէն անդրադառնում է եւ Թումանեանի մանկական ստեղծագործութիւններին: Ըստ յօդաձագրի՝ Թումանեանն ունի մանկան ներաշխարհը թափանցելու, նրա հոգեբանութիւնն ըմբռնելու, նրա սրտի հետ խօսելու բացառիկ կարողութիւն: Դա է պատճառը, որ դպրոցներում պահանջուած են Թումանեանի ստեղծագործութիւնները, յատկապէս պատկերազարդ գրքոյկները: Հեղինակն անդրադառնում է դրանցից երկուսին. «Մի Կաթիլ Մեղր»-ում ցոյց տալով կեանքի ու՝ մարդկային յարաբերութիւնների դատարկ ու ողորմելի պատկերը՝ Թումանեանը երեխաներին օրինակ է բերում «Հսկայի» չքնաղ գրոյցը, որ սովորեցնում է գնահատել իրական արժէքները եւ հասկանալ, որ մարդու մեծութիւնը պայմանաւորում է մարդասիրութեամբ եւ մեծահոգութեամբ:

Տէր Մարտիրոսեանի ուսումնասիրութեան մէջ նշանակալից է նաեւ Թումանեանի պոէմների լեզուին տուած գնահատականը. «Նրա լեզուն

ճկուն է, հարուստ, ճոխ եւ մարտնչի: Տարիների ընթացքում նա յամառ աշխատանք է թափել իր արտայայտութեան արտաքին ձեւերի վրայ եւ յաջողել է կարտրելութեան հասնել... Մեր գրականութեան մէջ ստեղծուել է մի դպրոց, որ յիրաւի Թումանեան կարելի է անուանել: Վ. Միրաքեանը իր «Լավլարի որսով», Գ. Մեսեանը իր «Չարի» պոէմով, մանկական ամսագիր «Հասկերի» շուրջ խմբուած Աթ. Իսնկոյեան, Յ. Աղաբաբ եւ այլ սկսնակ ուժեր յիշեալ դպրոցի աշակերտներ կարող են համարուել թէ՛ իրենց դիպաշարերով եւ թէ՛ արտայայտութեան ձեւերով»³⁷:

Ծաւալուն յօդուածի վերջում հեղինակը եզրակացնում է. «Սերունդներ կը գան ու սերունդներ կ'երթան, կեանքի առօրեայ մանր-մունր հոգսերին արծազանգող շափ հրապարակախօս գրողներ մոռացութեան կը փրոփին: Իսկ Թումանեանը՝ որպէս մաքուր արուեստի հաւատարիմ ու փաղանդատ արտայայտիչ, յաներժօրէն կ'ապրի հայ գրականութեան մէջ»³⁸:

Յօրեւեանական յօդուածների երկրորդ խումբը անլի հարուստ է այնպիսի հարցադրումներով, որոնք բանավեճերի առիթ են տուել ինչպէս իր ժամանակին, այնպէս էլ յետագայում՝ մինչեւ մեր օրերը:

Այսպէս՝ «Յարգանքի Խօսք Յովհ. Թումանեանին» յօդուածում Անանունը «Պառնասի գարդ» է անուանում բանաստեղծին՝ նրա կարեւորագոյն ստեղծագործական նուաճումը համարելով հայի կերպարի կերտումը, այն հայի, որն էութեամբ ու հոգեկան աշխարհով հարազատ է ամէնքին: «Թումանեանը,- պարզաբանում է իր միտքը քննադատը,- գերազանցապէս ժողովրդական բանաստեղծ է, ժողովրդի խորքից ելած եւ իբրեւ զանգուածային ընդերքի պարուղ՝ նա Խօսքի գոհար է»³⁹: Ոչ վաղ անցեալում (1912) Անանունը Թումանեանին նուիրում «Անցեալի Մեծարանքը» յօդուածում⁴⁰ զարգացնում էր այն հիմնական միտքը, թէ Թումանեանը «հայկական առանձնայատկութեան բանաստեղծ» է, որ մեծարել է «ժողովրդի այսպէս ասած քահել հասակը»՝ նահապետական գիտը: Յօդուածի շուրջ ծաւալում բանավեճի ընթացքում Անանունը շարունակ պնդում էր իր այն տեսակէտը, թէ՛ «Մենք Թումանեանին նրա հերոսների համար չենք դարձապարտել, այլ ասել ենք, որ նա մեծարում է անցեալը. մի բան, որ իրողութիւն է: Չէ՛ որ նկարագրած կեանքն այսօր անհետանում է: Թումանեանը սիրում է իր երգած աշխարհը: Եթէ այնպեղ նրա հասկացողութեամբ անիրատւութիւններ կան, ապա դրա համար վշտանում է»⁴¹: Անանունին հետաքրքրողը ոչ այնքան Թումանեանի ստեղծագործութեան գեղարուեստական արժէքն էր, որի վերաբերմամբ նա որեւէ վերապահութիւն չունէր, որքան այդ առիթով գրական քննադատութեան մէջ մարքսիստական պատմաընկերաբանական մեթոդի հաստատման ծգումը:

Նկատելի է՝ բանավեճը ծաւալում էր տարբեր աշխարհայեացքների, գեղագիտական սկզբունքների բախման շուրջ՝ ըստ էութեան շրջանցելով Թումանեանի ստեղծագործութեան իրական արժէքի խնդիրը: Բանավեճին հենց այս կողմից խառնում է Յակոբ Օշականը՝ անդրադառնալով Ա-

եանունի յօդուածին: Օշականն անհասականալի է համարում Թումանեանի ստեղծագործութեան՝ Անանունի վերլուծութեան մեթօդը. «Թերեա ուսաստայերը հանդուրժեն գրական այս վարկպարագի շեղումը, ես չեմ կրնար սակայն բացաբրել դիցագներգութիւնն ու ընկերաբանութիւնը իրար ծուլելու այս անհմաստ եռանդը»⁴²:

Գրախօսը հենց սկզբից, որպէս վերլուծութեան կանխադրոյթ, անվերապահ հաւաստում է, որ Թումանեանը մեր ամենամեծ բանաստեղծն է «դիցագներգութեան սեռին մէջ». «Յովհաննէս Թումանեան կը պատկանի այն հազուագիւր մարդերու խումբին, որոնք ժողովուրդներու պատմութեան այս ու այն կէտերուն վրայ կը բուսնին յանկարծ, առանց իրենք գիտենք անտարաբանելու: Իրենց երեսումը ճակատագրական բան մը ունի իր մէջ... Ամէն ազգ իրը ունի: Ու անոնք սերունդներուն շիրիմներուն վրայ իրենց փառքը կ'արձանացնեն ու անոնք միջակութիւններուն, հասարակութիւններուն ծանծրոյթը կը վոնտեն պատմութենէն»⁴³:

Այս խոր գիտակցութեամբ էլ քննադատն իր խօսքն ուղղում է Անանունին. «Երբե՛ք, պ. Դ. Անանու՛ն, այդ սքանչելի բանաստեղծը վերլուծելու համար տեղ չունին ձեր այնքան ճարտարօրէն տեղատրած պատկերացումները «Գիտլի կեանքից»⁴⁴: Զուգահեռներ տանելով Լաֆոնթէի հետ՝ Օշականը մօտենում է թումանեանական հերոսների գեղարուեստական կենսագործունէութեան իրական ակունքներին: Նրա հերոսները չեն մնում գիտլի նեղ սահմաններում. «Անոնք խորքին մէջ յալիտենական հոգիներ են, ցեղին քմայքն ու երեակայութիւնը կը խտրանայ անոնց մէջ»⁴⁵:

Տարիներ անց յրեւելեանական յօդուածում Անանունը կարծես երկրորդ տեղում է թողնում գնահատման նախկին ելակէտը եւ առաւելապէս ընդգծում բանաստեղծի ժողովրդայնութիւնը, որ յետագայում պիտի դառնար գեղարուեստի արժէքայնութեան չափանիշներից մէկը:

Սուրխաթեանը «Յովհաննէս Թումանեանի Տեղը Մեր Գրականութեան Մէջ» յօդուածում վիճարկում է Տէրեանի՝ դեռեա 1914ին արտայայտած «ունիկումի»⁴⁶ տեսակէտը՝ նկատելով, որ «բանաստեղծը իր լրիւ կերպարանքով կանգնած է հայ նորագոյն գրականութեան զարգացման գլխատր ճանապարհի վրայ, գտնում է նրա գլխատր հունի գլխին»⁴⁷: Սուրխաթեանն, իհարկէ, ճիշտ չի մեկնաբանել Տէրեանի «ունիկումի տեսութիւնը», որ ամենեւին էլ չէր նշանակում, թէ Թումանեանը առհասարակ մեկուսացուած է գրականութեան զարգացման միասնական ընթացքից. նա ինքն էր երեք տարի առաջ, արդէն ճշգրտել իր տեղը նոր շրջանի հայոց բանաստեղծութեան զարգացման հետեւողական շղթայում⁴⁸: Տէրեանի բնորոշումը նշանակում էր միայն, որ Թումանեանով ամարտում է արեւելահայոց բանաստեղծութեան մի ամբողջական շրջափոյ, որ դասական ամբողջականութեան է հասնում նրա ստեղծագործութեան լաւագոյն էջերում: Այս իմաստով էլ նա մնում է եզակի եւ անկրկնելի, այսինքն՝ «ունիկում»⁴⁹: Գրականագիտութեան մէջ դա արդէն վաւերացուած իրողութիւն է, ինչպէս գրում

է ճանաչուած թումանեանազէտը. «Ապագայի կուլտուրայի մէջ Թումանեանի ստեղծագործութիւնը թէւ կը պահպանի իր հմայքը իբրեւ ժողովրդական ոգու եւ իր ժամանակի անկրկնելի յուշարձան, բայց գալիքի հայ պոեզիան այլեւ նրա սկզբունքներով զարգանալ չի կարող: Ազգային մեծ բանաստեղծը միակն է եւ անկրկնելին: Նա պատկանում է բոլորին, բայց չի կարող ուղղակի նմանութեան աղբիւր լինել: Այսպէս էր մտածում Վահան Տէրեանը, երբ խօսում էր Թումանեանի եզակիութեան մասին»⁵⁰:

Յոբելեանական յօդուածում եւս Սուրխաթեանը, ինչպէս իր մարքսիստ գաղափարակից Անանունը, զարգացնում է այն միտքը, թէ Թումանեանը «մնացել է հաապարհիմ իր իդէալականացրած, իր սիրած աշխարհում, աւելի եւս ուժգին համակուելով հայրենի երկրի կարօտով»⁵¹:

Այս տեսակէտը նորութիւն չէր Սուրխաթեանի քննադատական ելոյթներում եւ ունէր իր որոշակի աշխարհայեացքային հիմքը, որ ձեւաւորուել էր արուեստի ընկերային համարժէքի վերաբերեալ մարքսիստական ուսմունքի շրջանակներում: Նա շատ լաւ տեսնում էր թումանեանական արուեստի մեծութիւնն ու անկրկնելիութիւնը, որ երեսում է բաական դիպուկ այն բնորոշումից, թէ «Թումանեանի դէմքը, որպէս բանաստեղծի, գեղարուեստական գրողի, լրիւ է: Նա, այսպէս ասած, արդէն հայկական Պառնասումն է»⁵²: Բայց երբ փորձում է իմաստատուել եւ արժեւորել նրա ստեղծագործութիւնն ըստ էութեան եւ մարդջութեան մէջ, բացում է նրա մօտեցման երկրորդ երեսը: «Բայց մենք ունենք սպասելիքներ, թէ՛ ոչ, - հարց է դնում նա եւ պատասխանում: - Այո՛, ունենք, բայց ոչ այնպիսի բաներ, որոնք նորութիւն լինէին բանաստեղծի համար: Նա ունի երկու պարզատրութիւն: Առաջին՝ շարունակել պրպտումներն ու գիւտերը ժողովրդական հոգեկան գաղտնարանն եւ ամփոփել նրանց գեղեցիկ ձեւերի մէջ: Երկրորդ՝ աւարտել հայդուկային շարժման պատկերացումը՝ փալով մեր կեանքի մի մեծ շրջանը կազմող այդ շարժման անձնագրի դոնկիխոտութեան նկարագիրը՝ բառիս ընդարձակ եւ լրջամիտ իմաստով»⁵³:

Երկու խնդիրներն էլ, որ դնում էր քննադատը բանաստեղծի առջեւ, նաեւ Թումանեանի նուիրական բաղձանքն էր՝ աւարտին հասցնել «Հագարան Բլբուլ» եւ «Հին Կոիւլը» պոէմները: Բայց ահա երկրորդի դէպքում մարքսիստ քննադատի «սպասելիքը» բոլորովին տարբեր էր բանաստեղծի մտայղացումից. նա հայդուկային շարժումը գեղարուեստի լեզուով պիտի յաւերժացնէր ոչ իբրեւ «դոնկիխոտութիւն», այլ որպէս հայրենիքի փրկութեան սրբազան կոիւ:

Այնուամենայնիւ, անկախ իր որդեգրած գաղափարական կաղապարներից, մարքսիստ քննադատը տեղի է տալիս բանաստեղծի իրական մեծութեան առջեւ՝ այդ մեծութիւնը տեսնելով ու գնահատելով յատկապէս պոէմների, առասպելների ու հեքիաթների մէջ, որտեղ, ինչպէս համոզուած է քննադատը. «հրապուրիչ պարզութեամբ մերկանում է հայ ժողովր-

դի հոգեկան աշխարհն ու կենսափիլիսոփայությունը՝ միաժամանակ բացայայտելով բանաստեղծի փառանդի ուժն ու թափը»: Սուրբաթեանը բարձր է գնահատում Թումանեանի ստեղծագործության թեմատիկ-գաղափարական հարստությունը, որ անչափ կարետոր է համարում մանուկ սերնդի դաստիարակման գործում:

«Մայիսի Մէկը եւ Յովհաննէս Թումանեանը» յօդուածում Ս. ստորագրութեամբ հեղինակը, որ հաւանաբար հանդէսի խմբագիր Սուրէն Երզնկեանն է, նոր ճեատորուող պրովետարական գաղափարախօսութեան դիտակէտից իրօրինակ մեկնաբանութիւն է տալիս Թումանեանի ողջ ստեղծագործութեանը. «Յովհաննէս Թումանեանը բանուորութեան երգիչը չէ: Նա չի երգել կողկերպի աշխարհի քաղցրութիւնը, բանուորի սրեղծագործող բազուկը, մեքենայի յուզիչ աղմուկը... բայց նա չի թունաւորել Նոյնպէս մեր սրտերը «ազգասիրական» մոտիւններով, մարդապետաց թոյնով: Թումանեանը... երգել է անհափի ազգապոփոխները, կոռուել է - պրովետարին յարուկ յամառութեամբ եւ շիտակութեամբ - Անդրկովկասի համերաշխութեան, վրացու-հայի-թուրքի եղբայրութեան համար, որի կարելիութեան նա միշտ էլ խորապէս հաւատացել է: Բանուոր դասակարգը չի՝ մոռանայ երբեք ազապ սարերի ու ձորերի փառանդատր երգչին, եղբայրութեան վեհ գաղափարի այդ համոզուած ու ազնիւ մարտիկին»⁵⁴: Այս մեկնաբանութիւնը լաւագոյն օրինակ կարող է լինել, թէ ինչպէս քննադատող գեղարուեստական ստեղծագործութեան իրական արժէքը պայմանաւորող գաղափարներն ու մտքերը կարող է յարմարեցնել ժամանակի պահանջներին կամ սեփական կանխադրոյթին՝ մեծ գեղագէտի հաւատարմութիւնը իր բարձր իդէալներին ներկայացնելով այնպէս, թէ նա «կոռուել է պրովետարին յատուկ յամառութեամբ ու շիտակութեամբ»:

Թումանեանի յրբեւեանական յօդուածների մէջ խորութեամբ ու ծաւլով առանձնանում է Վ. Խորէնիի «Գիւղական Աշխարհի Երգիչը» յօդուածը: Ուշագրաւ է, որ հեղինակը, քննադատական միակողմանիութիւնից խուսափելու համար, փորձում է կիրառել համադրական մեթոդը: «Գրական երկերի քննադատութիւնը օրեկօրի ու գիտական լինելու համար, յօդուածի սկզբում գրում է նա,- պէտք է ոչ միայն ենթակայիկ (սուբեկտիւ) կամ այսպէս կոչուած՝ պիսիտոգենետիկ, այլեւ սոցիալ-գենետիկ մեթոդով կատարուի: Միմիայն այսպիսի քննադատութիւնը կարող է գիտական լինել եւ ամբողջական ու ճիշտ պատկեր փալ սրեղծագործողի ու նրա սրեղծագործութեան մասին»:⁵⁵ Այս դիտակէտից էլ Խորէնին Թումանեանի ստեղծագործութիւնը քննադատում է իբրեւ «Գիւղական աշխատատրական աշխարհի բանաստեղծութիւն», իսկ բանաստեղծին՝ հայ աշխատատր գիւղացիութեան կեանքի, բնական եւ ընկերա-հոգեկան միջավայրի, նրա ապրումների ու իդէալների երգիչ, որ լի է անհատական յոյզերով, վշտերով, տենչանքներով եւ փիլիսոփայական խոհերով:

Իր միտքը հիմնատրելու համար Խորէնին անդրադառնում է ընկերային եւ հոգեկան այն միջավայրին, որտեղ ծնատրուել է բանաստեղծի աշխարհայեցողութիւնը: «Նա այնպէս է դիրում, սիրում ու պարկերացնում բնութիւնը,- բացատրում է քննադատը,- այնպէս է հասկանում ու սիրում մարդուն, այնպէս է սիրում կինն ու կեանքը, որպէս մտքով ինքնիշխան, բայց հոգով ու բնութեամբ գիւղացին»⁵⁶: Հեղինակը առանձին անդրադառնում է Թումանեանի՝ իր բնորոշմամբ «սոցիալ-աշխատատեղական» թեմայով գրուած ստեղծագործութիւններին: Իբրեւ ցայտուն օրինակ բերում է «Հառաչանք» պոէմը, որ, ինչպէս իր վերլուծութիւններով աշխատում է ցոյց տալ քննադատը, աշխատատեղ գիւղացիութեան ընկերային ծանր կեանքի տխուր հառաչանքների պարզ արտայայտութիւնն է, որտեղ բանաստեղծը ծերուկ գիւղացու միջոցով բացում է քաղաքական եւ ընկերային նոր յարաբերութիւնների պատճառով կեանքի որքերգական կողմերի իրական պատկերները: Դիպաշարի վերապատմումի, վերլուծութիւնների ամբողջ ընթացքում բացայայտ կամ քողարկուած երեւում է քննադատի «սոցիալ-գենետիկ» հայեցակերպը, որ բանաստեղծի մտքերը իմաստատարում է քաղաքական նոր իրականութեան տեսանկիւնից: Օրինակ՝ այն հատուածը, որտեղ ծերունին բողոքում է իրենց հոգսաշատ կեանքից, մեկնաբանում է այսպէս. «Ահա ծեղ պրոլետար գիւղացիութեան սոցիալ-լոնդոնական կարարեալ ու փխուր պարկերը»:⁵⁷ Մի այլ տեղ ծերունու խօսքերը, թէ ինքը չի հասկանում՝ «ո՞վ է մեղաւոր», բացատրում է այսպէս. «Ծայր դեմոկրատական եւ նոյնիսկ յեղափոխական մտքերը, որ նա արտայայտում է դրանից յետոյ, կասկած չեն թողնում, որ նման կարգերն ու բարքերը յեղափոխականացնում են անգամ ուստունամեայ ծերունուն եւ ըմբոստացնում նման անիրաւ ու անարդար կարգերի դէմ»:⁵⁸

Խորէնին ընդգծում է Թումանեանի՝ չքատր գիւղացու ընկերային ծանր կացութիւնը նկարագրելու վարպետութիւնը: Օրինակ է բերում «Չորան Չատու» պատմութիւնը, որ, ինչպէս մեկնաբանում է քննադատը, արտացոլում է ժամանակի վարքն ու բարքը, ընդգծում ազատասէր եւ արդարամիտ գիւղացու ընդվզումը ստի ու կեղծիքի դէմ, նրա պատուախնդրութիւնը՝ ապացուցելով, սակայն, թէ որքան անպաշտպան ու իրաւազուրկ են Չատին ու նրա նմանները: «Երբեք մեր բանաստեղծութեան մէջ սոցիալ-աշխատատեղական մտփոնները անլի ուժեղ ու անլի որոշ չեն հնչուել-գրում է Խորէնին:- Հայ աշխատատեղ գիւղացին սոցիալական հասարակութեան այնպիսի պարզ ու յստակ գիտակցութիւն է երեան բերում այս պոէմի մէջ, որ անգամ հայ քաղաքական-կուսակցական մամուլը չէ դրսեւորել... Մարդկանց ազատութեան ու սոցիալական հասարակութեան եւ արդարութեան ու ճշմարտութեան անլի գեղեցիկ ու գեղարուեստական պարկերացումն, քան «Հառաչանքն» է, մեր գրականութիւնը չունի»:⁵⁹

Խորէնին, իհարկէ, բարձր է գնահատում մարդկային-բարոյական ու բնական այն արժեքները, որ տեսնում ու կենդանագրում է Թումանեանի

իր երգերում: Բայց նա միշտ առաջին պլան է մղում այն միտքը, թե բանաստեղծի ստեղծագործությունը յատուկ արժեք է ներկայացնում նաեւ նոր գաղափարախօսութեան չափանիշներով:

Քննադատի դիտարկմամբ «Սասունցի Դաւիթ» պոեմը եւ «արդի գիւղացիութեան վիճակն է պատկերացնում», այսինքն՝ «նախապէս ազնուական-նախարարական» վէպը Թումանեանի մշակմամբ դարձել է «էապէս գիւղացիական-ժողովրդական» եւ ցոյց է տալիս, որ «մեր գիւղացիութեան կացութիւնը միջնադարից դէսը շարքից է փոխուել»: Յիշում է այն դրուագը, երբ Դաւիթը, քննադատի բնութագրմամբ՝ «իր աւարական նախարարական քմահաճոյքով մարզանքների ու որսի ժամանակ կոխկուրել է» գիւղացու արտը, ապա բերում է արտատէր պառաւի յանդիմանական խօսքերը՝ ուղղուած Դաւիթին, եւ եզրակացնում. «Աւելի գեղեցիկ ու անլի պարզ հագիւ թէ հնար լինել արփայարել ու պարկերատրել կիսաճորտական վիճակում ապրող եւ իր աշխատանքի արդիւնքից զուրկ աշխատատր գիւղացու հոգեբանութիւնը»:⁶⁰

Թումանեանի բազմալար քնարի երկրորդ գլխատր լարը համարելով հայրենասիրականը՝ Խորէնին նկատում է, որ Թումանեանի հայրենասիրութիւնը մի բնական զգացմունք է դէպի հայրենի, հարազատ բնութիւնը, ժողովուրդը: «Եթէ կ'ուզէք դա հայրենասիրութիւն չէ,- բացատրում է քննադատը,- այլ հայրենական բնասիրութիւն կամ բնապաշտութիւն ու ժողովրդասիրութիւն է: Այդպիսի հայրենասիրութիւնից հեռու է նախ ամէն տեսակ նեղ ազգայնականութիւնը եւ ապա՝ դա անբաժան է իրական ժողովրդասիրութիւնից ու իսկական մարդասիրութիւնից»:⁶¹ Մատնացոյց անելով «Նախերգանք»ում դրսեւորուած հայրենասիրութեան նրբերանգները՝ նկատում է, որ բանաստեղծի հոգու անյատակ վիշտն ու հայրենիքի խորունկ ցաւերը խառնուում են «մի հոգեպարար, մի հաշտարար վսեմ համազգացումի մէջ... որի համակիր ներապրումի մէջ ի մի են ծուլում անհարկական ծանրաթախիծ ես-ն իր ապրումներով եւ հարուածուած կամ «զարկուած ու զրկուած» հայրենիքը իր «հազարատր ցաւերով»:⁶²

Իհարկէ, Խորէնին այստեղ նոյնպէս չի մոռանում իր կանխադիր «սոցիալ-գնենտիկ» մեթոդին տրամաբանութիւնը, որի համաձայն՝ այդպիսին կարող է լինել միայն «աշխատատր ու այդ իսկ պարճառով խաղաղասէր ժողովրդի իսկական հայրենասիրութիւնը»: Դա ժամանակի պարտադիր հարկն էր քննադատի որդեգրած նոր գաղափարախօսութեանը: Էականն ու մնայունը այն բանական ներդրումն է, որ ժամանակին կատարել են նա եւ՝ իր գաղափարակից քննադատները նոր ձեւատրուող թումանեանագիտութեան մէջ:

Թումանեանի յրբեւեանական յօդուածների մէջ իր ուրոյն տեղն ունի Վալերի Բրիաւովի՝ Հայաստանի Պոեզիան ժողովածուի առաջաբանում Թումանեանին նուիրուած հատուածը, որը բանաստեղծի ծննդեան 50ամեակի առթիւ յայտնում է Յառաջում: Անշուշտ, նախածնունդի՝ Սալլու-

եանի նպատակը մէկն էր. մէկ անգամ եւս ընդգծել, թէ հայ ժողովրդի բանաստեղծը ինչպիսի՛ գնահատանքի է արժանացել ռուս անուանի բանաստեղծի կողմից: Թումանեանի ստեղծագործական նկարագրի մասին Բրիտովն անում է կարճ, պատկերատու, հարեանցի թուացող դիտարկումներ, որոնք հեռուն գնացող խորքային կռահումներ են պարունակում իրենց մէջ: Ամփոփելով իր միտքը Թումանեանի մասին՝ Բրիտովն գրում է. «Ամբողջութեամբ վերցրած՝ Թումանեանի պոեզիան ինքը Հայաստանն է՝ հին ու նոր, որը յարուստ է առնում եւ տպավորում բանաստեղծութիւնների մէջ մեծ վարպետի ճեղքով»⁶³:

Ուշագրաւ է նաեւ Գորոդեցկու «Իմաստուն եւ նուրբ» յօդուածը՝ տպագրուած *Заквказское Слово* թերթում: Ռուս մտատրականի՝ Թումանեանին գնահատելու նոր փորձը գրեթէ նոյնանում է բրիտովեան քննութագրի հետ: Թումանեանի ստեղծագործութիւնը եւ անձը դիտարկելով իբրեւ մէկ ներդաշնակ ամբողջութիւն՝ Գորոդեցկին գրում է. «Հասկանալ Յովհաննէս Թումանեանին նշանակում է հասկանալ Հայաստանը՝ խաղաղ երկրային կեանքի նրա վաղեմի գաղափարներով, քնութեան ու մարդկանց համագործակցութեան մէջ հովուերգական կեանքի նրա ծգտումով, հակառակ պայմանութեան ողբերգական ընթացքի... Նրա ստեղծագործութիւնները յուշարձանն են Հայաստանի պայմական գոտապանքների եւ ուխտը՝ նրա հարուստ ապագայի...»⁶⁴: Գորոդեցկին, որ տարիների մտերմութեամբ կապուած էր Թումանեանի հետ, բանիմաց դիտարկումներով բացում է նրա մարդկային հազուագիւտ ներաշխարհի ու ստեղծագործութեան շատ նրբերանգներ: Թերթի նոյն համարում տպագրում են նաեւ Լեան Կիպիանու⁶⁵ եւ Վարդգէս Ահարոնեանի յօդուածները: Առաջինում հեղինակը Թումանեանին համարում է երկու՝ հայ եւ վրաց ժողովուրդների մշակութային անտրոհելի կապի կարեւոր շղթան: Իսկ երկրորդ՝ «Հայրենի Լեռների Երգիչը» յօդուածում Ահարոնեանը զարգացնում է այն միտքը, թէ Թումանեանը այն եզակի անհատներից էր, որ ամէն ինչում՝ թէ՛ ստեղծագործելիս, թէ՛ կեանքում առհասարակ, դնում են իրենց շունչն ու հոգին՝ դառնալով սեփական ժողովրդի անցեալը, ներկան եւ ապագան ամբողջացնող մի կոթող:

1919ի *Տարագի*, հմ. 10ում (Հոկտեմբեր) տպագրուած յօդուածը՝ Տիգրան Նազարեանի ստորագրութեամբ, կարծես իւրօրինակ ամփոփումը լինի յրբեւեանական բազմաթիւ հանդիսութիւնների ու հրապարակումների: «Առաջին անգամն էր,- գրում է Նազարեանը,- որ Թիֆլիսի մատուցականութիւնը, Թիֆլիսի հասարակութիւնը՝ առանց ազգերի ու կուսակցութիւնների խտրութեան, ինքնաբերաբար ու սրտաբառի կերպով այնպիսի ջերմ ու այնպիսի վայելուչ ցոյցեր արաւ ու յարգանքներ փոաւ հայ գրականութեանը ի դէմս նրա փայլուն ներկայացուցչի Յովհ. Թումանեանի: Առաջին անգամն էր, որ մեր գրողներին ու բանաստեղծներին տեսանք՝ կուսակցութիւնների ու լրագրերի կապանքներից ազատագրուած եւ միմ-

եանց մօտ նստած. Առաջին անգամն էր, որ տեսանք հրապարակիչներին ու ընդհանրապես մեր ընտիր գրողների ստեղծագործական աշխատանքի պտուղները վայելողներին՝ նրանց որոնելիս, մեծարելիս...»⁶⁶: Ասումը խօսուն վկայություն է, որ Թումանյանից առաջ դեռևս ոչ մի հայ գրող իր ժամանակակիցների, հայ եւ այլազգի անմիջական շրջապատի, պետական այրերի եւ վերջապես հարազատ ժողովրդի կողմից այնպես սիրով ու ակնածանքով մեծարանքի չէր արժանացել՝ իբրեւ ազգանուէր գործիչ, իբրեւ մարդասէր ու նուիրեալ քաղաքացի, ինչպէս Թումանյանը իր յոբելեանի օրերին: Չափազանցություն չի լինի, եթէ ասենք, որ Թումանյանի ծննդեան 50ամեակի տօնակատարությունները հայ մշակոյթի պատմութեան մէջ մնացին եզակի եւ անկրկնելի:

Այսօր արդէն նշում է Թումանյանի ծննդեան 150ամեակը, եւ պատուի ու պատասխանատուութեան խնդիր է դնում նրա նուիրական երազանքն իրականացրած ներկայ սերունդի առջեւ՝ արժանին հատուցելու ազգային մեծ բանաստեղծին այն ամէնի համար, ինչ նա իր հանճարի ուժով, իր եւ իր գաւակների կեանքի գնով արեց յանուն հայ ժողովրդի ու նրա ազգային մշակոյթի յարատեւութեան:

ԾԱՆՕԹԱԳՐՈՒԹԻՒՆՆԵՐ

¹ Նրա գործուն մասնակցութեամբ են իրականացուել Շիրվանզադէի, Յովհաննէ Յովհաննիսեանի, Լէոյի յոբելեանական հանդիսությունները:

² Յովհաննէ Թումանյան, *Երկերի Լիակապար ժողովածու Տասը Հափորով, Հտր. 6*, Երեւան, ՀՀ ԳԱԱ «Գիտություն» Հրատ., 1994, էջ 173-4:

³ *Հորիզոն*, Թիֆլիս, 30 Դեկտեմբեր 1909: «Պատշաճատրություն, վայելչություն» բառերը վերցրած են «Ի՞նչ ենք Ուզում Ասել» անստորագիր առաջնորդոյից, որտեղ բացատրում է «Յոբելեանների Դէմ» յօդուածի մէջ առաջ քաշուած հարցը: Հնարատր է, որ առաջնորդողը գրած լինի Թումանյանը, սակայն այժմ բանասիրական փաստարկներով հաստատել անկարելի է: Տե՛ս նաեւ՝ Թումանյան, *Երկերի Լիակապար ժողովածու, Հտր. 6*, էջ 598-9:

⁴ Թումանյան, *Հտր. 10*, Երեւան, ՀՀ ԳԱԱ «Գիտություն» Հրատ., 1999, էջ 304:

⁵ Լեւոն Հախվերդեան, *Թումանյանի Կեանքը*, Երեւան, «Հայաստան» Հրատ., 1969, էջ 71-2:

⁶ Եղիշէ Չարեցնի Անուան Գրականութեան եւ Արուեստի Թանգարան (ԳԱԹ), Թումանյանի Ֆոնդ (ԹՖ), 2658 (1299):

⁷ *Յառաջ*, Թիֆլիս, 20 Փետրուար 1919:

⁸ ԳԱԹ ԹՖ, 2143 (1083):

⁹ *Մշակ*, Թիֆլիս, 20 Փետրուար 1919:

¹⁰ ԹԹ (Թումանյանի թանգարան) ԳԳ (գլխատր գոյքամատեան), 1082 (I) 20:

¹¹ ԹԹ ԳԳ, 1083 (I) 21:

¹² ԳԱԹ ԹՖ, 2655 (1295):

¹³ *Փարոս*, Թիֆլիս, 1 Մարտ 1919, էջ 3:

¹⁴ *Ժողովրդի Ձայն*, Թիֆլիս, 23 Մարտ 1919:

¹⁵ *Յառաջի* նոյն համարում տպագրում է Թումանեանի կենսագրականը:

¹⁶ *Ժողովրդի Ձայն*, 20 Փետրուար 1919:

¹⁷ Թումանեան մանկագրի գրական ուղին սկսում է 1890ին, երբ Ղազարոս Աղայեանի խորհրդով «Արեւ եւ Լուսին» առասպելը տպագրում է *Աղբիւր* մանկական ամսագրում: Իհարկէ, յայտնի է, որ դեռեւս 1886ին Թումանեանը գրել էր իր նշանատուր «Շունն Ու Կատուն», որը, սակայն, տպագրուել է անլի ուշ (1892): Մանկագրութեան ասպարէզում Թումանեանի գրիչը առաւել բազմաբեղուն է դառնում 1905ից, երբ սկսում է աշխատակցել *Հասկեր* մանկական ամսագրին, իսկ անլի ուշ՝ 1907ին, մասնակցում է *Լուսաբեր* դասագրքի ստեղծման աշխատանքներին: Մանկական գրականութիւնը հարստանում է սքանչելի ու գողտրիկ բանաստեղծութիւններով, փոխադրութիւններով ու թարգմանութիւններով, ժողովրդական բանահիւտութեան աննման մշակումներով: Պատահական չէ 1908ին իշխանուի Մարիամ Թումանեանի ձեռնարկը՝ «Մանկական Գրադարան» մատենաշարի հրատարակութիւնը, ինչը որոշակիօրէն հաստատում է՝ բանաստեղծի մանկական երկերը սիրուած ու սպասուած էին եւ բացառիկ տեղ ունէին մանկական գրականութեան մէջ:

¹⁸ *Ժողովրդի Ձայն*, 20 Փետրուար 1919:

¹⁹ Նոյն:

²⁰ Հանդէսի այն համարը, որտեղ յօդուածի սկիզբն է, չի պահպանուել:

²¹ *Հայ Համայնք*, Նոր Նախիջեան, 26 Մայիս 1919, էջ 247:

²² Նոյն:

²³ Նոյն, էջ 249:

²⁴ *Մշակ*, 20 Փետրուար 1919:

²⁵ Նոյն:

²⁶ Նոյն:

²⁷ Նոյն:

²⁸ Այդ մասին անլի մանրամասն տե՛ս՝ Եւա Մնացականեան, «Թումանեանը եւ Բանավէճերը Բանահիւտական Թեմաների Գրական Մշակումների Շուրջ», *Հայկազեան Հայագիտական Հանդէս*, Հտր. ԼԸ., 2018, էջ 405-20:

²⁹ Գորոզեցկին Թումանեանին նուիրուած իր յօդուածում գրում է. «*Հայկական բանաստեղծութեան համար Թումանեանն արել է նոյնը, ինչ որ Պուշկինը մեր գրականութեան համար: Ժողովրդական լեզուի լաւագոյն փորապետողն ու իմացողը՝ այդ լեզուն մրցրել է գրականութեան մէջ, մշակել ժողովրդական էպոսը, բազմաթիւ լեզնեղներ ու հեքիաթներ*» (Ս. Գորոզեցկի, «Յովհաննէս Թումանեան», *Մարտակոչ*, Ապրիլ, 1923):

³⁰ Վահան Տերեան, *Երկերի ժողովածու*, Հտր. 3, Երեւան, «Հայաստան» Հրատ. 1975, էջ 89:

³¹ *Մշակ*, 20 Փետրուար 1919:

³² Նոյն:

³³ Նոյն:

³⁴ Ե. Տէր Մարտիրոսեան, «Յովհ. Թումանեան», *Այլը Գրական ժողովածու*, 1 գրքոյկ, Պիատիգորսկ, 1919, էջ 35:

³⁵ Նոյն:

³⁶ Նոյն, էջ 43:

³⁷ Նոյն, էջ 50-1:

³⁸ Նոյն, էջ 51:

³⁹ *Մշակ*, 20 Փետրոսար 1919:

⁴⁰ Յօդուածի դրոյթները Անանունը ներկայացնում է նաեւ 1913 Ապրիլի 6ին գրական-գեղարուեստական ակումբում կայացած դասախօսութեան ընթացքում, որի մասին *Քաջուի Ձայն* թերթում կայ երկու անդրադարձ: Զեկուցման դրոյթների դէմ հանդէս են գալիս Սիմոն Յակոբեանը եւ Գրասէրը (Յուլակ Խանզադեան): Դասախօսութիւնը առիթ է դառնում, որ Խանզադեանը վերանայի «Անցեալի Մեծարանք» յօդուածը եւ նոյն *Քաջուի Ձայն*ում տպագրի իր դիտարկումները յօդուածի վերաբերեալ: Շաալտում է մեծ բանավէճ Անանունի եւ Խանզադեանի միջեւ: Չհամաձայնելով Անանունի տեսակէտին՝ Խանզադեանը պաշտպանում է այն միտքը, որ «*Թումանեանը չի մեծարում, չի իդէալականացնում, այլ օրելկրի գեղարուեստագէտի բարեխղճութեամբ վերարտադրում է հայ գիտի ցաալի իրականութիւնը*» (*Քաջուի Ձայն*, 21 Ապրիլ 1913): Գրասէրը թերութիւն է համարում այն, որ յօդուածագիրը «Յուլի. Թումանեանի Քնարը» վերնագրի ներքոյ շօշափել է բանաստեղծի «բազմալար եւ խորահնչիւն քնարի մի քանի լարը միայն»: Իբրեւ բացթողում՝ Խանզադեանը մատնանշում է նաեւ, որ Անանունը չի անդրադարձել Թումանեանի թարգմանութիւններին: «*Մեր փայլուն բանաստեղծը թարգմանական այնպիսի գոհարներ է փունջ, որոնց նմանը, իմ կարծիքով, հայոց թարգմանական գրականութիւնը չափ քիչ ունի ...: Այդ մասին էլ ոչ մի խօսք չէր գրել Պ. Անանունի յօդուածում*» (նոյն): Բանավէճին անուղակիօրէն մասնակցում է նաեւ Սուրխաթեանը *Մշակի* հմ. 104, 105ում («Անցեալի Մեծարանքը» յօդուածի արձագանգների մանրամասները տե՛ս մեր՝ «Դափթ Անանունի «Անցեալի Մեծարանքը» Յօդուածը՝ *Քնարեր Հայագիտութեան*, 2016:3, Երեսան, էջ 159-73):

⁴¹ *Քաջուի Ձայն*, Բաքու, 28 Ապրիլ 1913:

⁴² *Հայ Գրականութիւն*, հմ. 4, 1/14 Նոյեմբեր, Զմիւտնիա, Տպ. Քեշիշեան, 1912, էջ 21-2:

⁴³ Նոյն, էջ 22:

⁴⁴ Նոյն:

⁴⁵ Նոյն, էջ 23: *Գարուն* ավանախօսում Թումանեանին նուիրում յօդուածները առիթ էին դարձել նաեւ, որ պոլսահայ մտատրականութիւնը նորովի հայեացք նետի բանաստեղծի արուեստին: Նոյն 1912ին Պոլսի *Կոհակում*⁴⁵ Օշականի միտքը այլ ձեակերպումներով զարգացնում է Գ. Գապայեճեանը՝ Թումանեանին համարելով հանճարեղ բանաստեղծ. «*Կան հանճարներ որոնք մշտապես ու տեսական են ճիշտ այն աղբիւրներուն պէս, որոնք շարունակ կը հոսին առանց կանգ առնելու, առանց դադրելու իրենց սովորական ընթացքէն, եթէ նոյնիսկ երաշտ եղանակ մը ցաալիօրէն ցամբեցնէ ամէն ինչ*» (*Կոհակ*, հմ. 1, Պոլիս, 1912, էջ 8):

1912ին Պոլսի *Ազատամարտ* օրաթերթում (հմ. 916, 917, 918, 921, 922, 923) շնորանակաբար տպագրում է Ռ. Դարբինեանի ընդարձակ գրախօսականը՝ նուիրում *Գարուն* ավանախօսին: Յօդուածի վերջին՝ ճոր մասում, Դարբինեանը համառօտակի անդրադառնում է Թումանեանին նուիրում յօդուածներից մէկին միայն՝ Պօղոս Մակինցեանի «Դիմագծեր»ին՝ բացարձակ լռութեան մատնելով Անանունի «Անցեալի Մեծարանքը»: Դա պատահական չէր. դաշնակցական գաղափարախօսին մարքսիստ քննադատի յօդուածը չէր կարող բաւարարել ո՛չ գե-

դարուստական բնագրի վերլուծության մեթոդի, ո՛չ աշխարհայեացքային ելակետի առումով: Դարբինեանը քննորոշ քաղաածքներ է անում Մակինցեանի յօրուածից եւ լռելեայն համաձայնելով քննադատի բնութագրումներին՝ եզրափակում է. «Որպէս գեղարուեստական տաղանդ Յովհ. Թումանեան անտարակոյս մեր մեծագոյն ազգային բանաստեղծն է. եւ կ'արժէ որ թրջահայ ընթերցողն ալ մտերմանար անոր՝ այնպէս, ինչպէս ուսաստայ ընթերցողը»:

⁴⁶ 1914ի գարնանը Տէրեանը հանդէս է գալիս «Հայ Գրականութեան Գալիք Օրը» զեկուցմամբ, որտեղ անդրադառնում է նաեւ Թումանեանին: Բարձր գնահատելով նրան՝ իբրեւ գեղարուեստագէտի եւ ժողովրդական հոգու իմաստուն ու վսեմ թարգմանի՝ Տէրեանը նշում է, որ «նա կանգնած է իր յարուկ ճանապարհի վրայ, որ լի է գեղարուեստական հրաշալիքներով, սակայն նա կը մնայ իբրեւ մի ունիկում, եւ նրա ճանապարհը չի լինելու ապագայ հայ պոեզիայի ճանապարհը» (Վ. Տէրեան, *Երկերի ժողովածու*, Հտր. 3, էջ 72-3):

⁴⁷ Մշակ, 20 Փետրուար 1919:

⁴⁸ Այդ մասին Թումանեանն ասել է 1916 Դեկտեմբերի 30ին Գրողների Ընկերութեան երեկոյթում, Սուրբաթեանի «Ռուսահայ Նորագոյն Բանաստեղծութիւնը» դասախօսութիւնից յետոյ՝ խօսքն ուղղելով սկսնակ գրողներին. «Ռուսահայ բանաստեղծութիւնը երեք շրջան է ունեցել: 1857 թուականին ուսանող Ռ. Պարկանեանը՝ Գամառ-Քաթիպան, հրատարակել է իր «Ազգային Երգարան» անունով բանաստեղծութիւնների տեղադրակն ու դրանով սկիզբն է դրել առաջին շրջանի բանաստեղծութեան:

Նրանից երեսուն տարի յետոյ, 1887 թուականին ուսանող Յ. Յովհաննիսեանը հրատարակեց իր բանաստեղծութիւնների առաջին գիրքը, ու սկիզբն առաւ երկրորդ շրջանի բանաստեղծութիւնը:

Յովհաննիսեանից երեսուն տարի յետոյ էլ, 1908 թուականին դարձեալ ուսանող՝ Վ. Տէրեանը հրատարակեց իր «Մթնշաղի Անուջներ» ու առաջ եկաւ երրորդ, նորագոյն շրջանը, որի մասին հանդիսատար ու հաւաքական կերպով խօսում ենք էսօր Հայ գրողների ընկերութեան մէջ:

Ինչպէս տեսնում էք՝ եւ ընկնում են երկրորդ շրջանի մէջ եւ կանգնած են հին շրջանի ու նորագոյնի մէջտեղը» (Թումանեան, Հտր. 7, 1995, էջ 300-1):

⁴⁹ 1915 Նոյեմբերին Նուարդ Թումանեանին գրած նամակում Տէրեանը խոստովանում է անում. «Թումանեանի գրած ամէն մի տողը ինձ համար հետաքրքրող է եւ նշանակալից, թէւ իբրեւ պոէտի եւ ինձ միանգամայն օտար են զգում նրան, այսինքն՝ նրա պաֆոսը իմ պաֆոսը չէ՝ եւ նրան երկրպագու եմ եւ սիրում եմ, բայց նրա աշխարհին իմ աշխարհը չէ (յուսով եմ, սխալ չէք ըմբռնի ինձ - տրանով եւ չեմ ժխտել նրա մեծութիւնն ու նշանակութիւնը, հասկանում էք ինձ, նոյնը կարող էի ասել, օրինակ, մի Շեքսպիրի մասին)» (Վ. Տէրեան, *Երկերի ժողովածու*, Հտր. 4, Երեւան, «Սովետական Գրող» Հրատ., 1979, էջ 240):

⁵⁰ Էդ. Զրբաշեան, *Թումանեանը եւ Հայ Գրականութեան Աւանդոյթները*, Երեւան, ՀՀ ԳԱԱ «Գիտութիւն» Հրատ., 1994, էջ 404-5:

⁵¹ Մշակ, 20 Փետրուար 1919:

⁵² Նոյն:

⁵³ Նոյն:

⁵⁴ *Բանուոր*, ամսագիր, Թիֆլիս, Հմր. 1, 1919, էջ 25:

⁵⁵ *Յառաջ*, 20 Փետրուար 1919:

⁵⁶ Նոյն:

⁵⁷ *Աշխատարար*, Թիֆլիս, 14 Մարտ 1919:

⁵⁸ Նոյն, 15 Մարտ 1919:

⁵⁹ Նոյն:

⁶⁰ *Յառաջ*, 20 Փետրուար 1919:

⁶¹ Նոյն. նաև՝ *Աշխատարար*, 19 Ապրիլ 1919:

⁶² *Աշխատարար*, 26 Ապրիլ 1919:

⁶³ *Յառաջ*, 20 Փետրուար 1919:

⁶⁴ *Закавказское Слово*, 20 Փետրուար 1919:

⁶⁵ *Закавказское Слово* թերթի 26 Փետրուարի 1919-ում տպագրում է Լև Կիպիանու «О Капле Меда» (Մի կաթիլ մեդրի մասին) խորագրով յօդուածը: Նա բարձր է գնահատում Թումանեանին՝ իբրև գրողի եւ մարդկային տեսակի, վկայակոչելով այդ առթիւ յոբելեանական հանդիսութիւնները, հասարակութեան, յատկապէս երեխաների կողմից ինքնարուխ կազմակերպուած միջոցառումները, վրաց կառավարութեան ներկայացուցիչներ ժորդանիայի, Գեգեչկորու եւ այլոց յոբելեանական հեռագրերը, դրանցում արտայայտուած մեծազոյն սէրն ու յարգանքը բանաստեղծի հանդէպ:

⁶⁶ *Տարագ*, Հոկտեմբեր 1919, էջ 68:

ASSESSING TOUMANYAN'S LITERARY WORKS ON HIS 50TH BIRTHDAY (1919)

(Summary)

EVA MNATSAKANYAN

mnacakanyaneva@mail.ru

In February-March of 1919, Toumanyan's 50th birthday was celebrated with great, pan-national enthusiasm. Though the poet was against such a celebration, it turned into a real national holiday. On the occasion various diverse articles were written evaluating the writer's literary works.

The paper draws a panoramic picture of the articles written and analyzes their content, focusing on the aspects which were more highlighted and appreciated, the impact his literature had on Armenian literature and poetry in particular, as well as those aspects which touched upon his personality and character, and assesses how genuine Toumanyan was in his literary career.